

Insaniah ambil pelajar baru peringkat Sarjana Muda

ALOR SETAR 6 Ogos — Institut Agama Islam Kedah (Insaniah) akan mengambil pelajar baru peringkat Ijazah Sarjana Muda melalui program berkembar dengan Universiti Al-Azhar bermula 12 Ogos ini.

Pengarahnya, Profesor Datuk Dr. Marzuki Mahmood berkata, pengambilan pelajar baru sesi pengajian 2001/2002 itu adalah bagi tiga kuliah pengajian Islam iaitu Usuluddin, Syariah dan Bahasa Arab.

“Tahun ini kita akan mengambil seramai 316 orang iaitu 106 orang pelajar lelaki dan 210 pelajar perempuan yang layak dari seluruh negara dan luar negara yang telah membuat permohonan pada bulan April lalu,” katanya dalam satu kenyataan akhbar hari ini.

Menurut Dr. Marzuki, jawatankuasa pemilihan pelajar yang dipengerusikannya juga telah menetapkan dari jumlah besar tersebut, 121 orang adalah untuk kuliah Usuluddin, 129 orang Syariah dan 66 orang untuk Bahasa Arab merangkumi tahun satu, dua, tiga dan empat.

Beliau menambah, kemasukan pelajar antarabangsa sesi ini adalah sebanyak 30 orang iaitu dari Singapura, Thailand, Indonesia dan China berbanding sesi lalu 12 orang sahaja.

Bagaimanapun selepas hari pendaftaran, Insaniah akan mempunyai 59 orang pelajar antarabangsa tahun ini, katanya.

Insaniah juga, katanya akan membuat pendaftaran pelajar baru di kampusnya di Kompleks Al-Bukhary, Jalan Langgar, Alor Setar pada hari berkenaan.